

尙不敷議定無分南岸北岸每引攤交銀二錢每年約可得銀十萬兩上下以備緝私要需並請永遠革除加秤減價及代銷貼併名目以免偏枯一轉移間既可籌出鉅款又可暢銷引額如果辦有成效日後將通綱賣價陸續增歸一律尤能裨益餉需等情該署司查蘆綱積弊固由於稍私充斥亦由於活秤活價致起競爭故於欽奉 恩旨簡署長蘆運司責成認真整頓之初卽密委委員分赴各引岸考察鹽價鹽秤嗣據各委員查明稟覆並將各岸引鹽各購一斤隨稟呈閱綜核現在賣價有較例價加多半文至八文不等者現用鹽秤有較官秤短少一兩至七兩不等者平時如此迨醬菜二秋又有放價放秤以充斥鄰岸者弊竇叢生無怪私充官滯此弊不除商民交受其病引數斷難復額該署司向綱商再三勸導不啻舌敝唇焦始各自悔前非稟請除弊詳加察核確係實在情形詳請具 奏前來臣查長蘆鹽斤活價活秤積弊甚深既經該署司再三勸導該商等始各自悔前非公擬切實辦法每年可得餘利銀五六十萬兩洵屬有裨餉需應懇 天恩寬其既往准如所請辦理庶於恤商之中仍寓籌款之法實於大局裨益匪淺謹 奏奉 硃批戶部知道欽此

署山東巡撫胡奏查明山東省各屬經征錢漕折征數目摺

竊查前准戶部咨奉 上諭著各省督撫將各屬經征錢糧開列簡明表冊該州縣錢糧正

額若干現在征收若干向係收銀者註明每賦一兩正耗各收銀若干或係收錢折銀或係收銀元作銀均註明每銀一兩折收若干每漕糧一石收本色連正耗各收米若干收折色者每石收銀錢若干此外有無陋規雜費逐一登明據實聲叙俟該省奏報到後著戶部核對由政務處刊入官報等因欽此欽遵咨行到東當經正任撫臣周馥分飭司道查辦去後臣前在藩司任內接奉行知遵卽查明東省州縣從前征收錢糧本有錢號銀號之別自光緒二十七年經升任撫臣袁世凱將通省錢糧無論原征錢號銀號及銀錢兼收一律改爲每正銀一兩連一四耗銀火耗解費一切辦公等項共收制錢二千四百文由州縣易銀解兌此外不准絲毫多取惟近年銀價減落州縣以錢易銀不無盈餘亦經節次提解歸公以作右軍先鋒隊月餉黃河搶險經費及攤還洋款辦理新政等項之用州縣所餘無多僅敷辦公定章之外並無浮收陋規雜費於上年九月間造具簡明表冊詳明正任撫臣周馥未及核奏至漕糧一項上年十二月間始據布政使尙其亨會同督糧道周開銘查明東省漕糧自前撫臣閻敬銘 奏准定案向征折色者每正米一石折收制錢六吊文一五耗米隨正核收制錢九百文至光緒二十七年遵 旨一律改征折色仍按照每正米一石連一五耗米共折收制錢六吊九百文其不及此數者仍循其舊東省有漕州縣分隸六府二直隸

州總計六十九處除齊東濮州范縣壽張四州縣皆因黃水爲災漕糧久已停徵如陵縣折收漕米分爲兩等本色地糧每正米一石折收制錢六千文耗米隨正核收與定章相符其寄莊糧戶無論正耗每石正折收制錢五千文他如樂陵縣正耗米每石共折收制錢六千二百五十文濱州正耗每石共折收制錢六千三百二十二文觀城朝城等縣正米一石連一五耗米共折收制錢六千文冠縣內分三等行戶連耗每石折收制錢六千二百文民戶連耗每石折收制錢六千九百文寄莊連耗每石折收制錢六千文此外又有臨德常三倉米石如臨清濟甯二直隸州歷城等二十二州縣或係折解道庫湊解各項餉需或由州縣就近撥支各營兵丁月餉或解道支放德州滿營兵米向不收耗每石均折制錢六千文德常二倉及餘剩孤貧等米例不缺額遇有災傷統歸大漕行潤項下核辦蠲緩均無浮收情弊亦無陋規雜費名目等情詳請彙摺具 奏前來臣逐加覆核州縣經征錢漕解兌出入銀錢實已和盤託出並無含混遺漏謹 奏奉 硃批戶部知道欽此

兩廣總督岑廣東巡撫張會奏第四屆闡捐減餉招商承辦摺

竊照廣東商人承辦闡姓捐輸每屆二十八場以六年爲期上次第三屆由商人韋崧等承餉四百四十萬元自丁酉年文闡鄉試起至癸卯年武闡鄉試止本已年期屆滿中間因庚